

Հաստատված է  
Հայաստանի պետական տնտեսագիտական  
համալսարան» ՊՈԱԿ գիտական խորհրդի  
2018 թվականի մարտի 5-ի նիստում,  
արձանագրություն N 5,  
գիտական խորհրդի նախագահ, ռեկտոր

  
\_\_\_\_\_ Կ. Լ. Աթոյան  
« 05 » \_\_\_\_\_ 03 2018 թ.



**ԿԱՆՈՆԱԿԱՐԳ**  
**ՀԱՅԱՍՏԱՆԻ ՊԵՏԱԿԱՆ ՏՆՏԵՍԱԳԻՏԱԿԱՆ ՀԱՄԱԼՍԱՐԱՆԻ ԱՌԿԱ**  
**ՌԻՍՈՒՑՄԱՄԲ ՄԱԳԻՍՏՐԱՏՈՒՐԱՅԻ 2018-2019 ՈՒՍՈՒՄՆԱԿԱՆ ՏԱՐՎԱ**  
**ԸՆԴՈՒՆԵԼՈՒԹՅԱՆ**

1. Սույն կանոնակարգի իրավական հիմքերն են «Կրթության մասին», «Բարձրագույն և հետբուհական մասնագիտական կրթության մասին» Հայաստանի Հանրապետության օրենքները, ՀՀ կրթության և գիտության նախարարի հրամանով հաստատված «Հայաստանի Հանրապետության բարձրագույն ուսումնական հաստատություններում մագիստրատուրայի ընդունելության և ուսուցման կարգը», ՀՊՏՀ կանոնադրությունը:

2. ՀՊՏՀ առկա ուսուցմամբ մագիստրատուրա մրցութային կարգով կարող են ընդունվել ՀՀ պետական և ըստ մասնագիտությունների հավատարմագրված ոչ պետական բարձրագույն ուսումնական հաստատությունների բակալավրի, դիպլոմավորված մասնագետի կամ մագիստրոսի որակավորում ունեցող անձինք: Մագիստրոսի աստիճան ունեցող քաղաքացիները երկրորդ մագիստրոսական կրթություն կարող են ստանալ միայն վճարովի հիմունքներով:

3. Մագիստրատուրայի ընդունելությունը (փաստաթղթերի ընդունում և քննությունների կազմակերպում) իրականացնելու նպատակով ձևավորվում է ընդունող հանձնաժողով՝ ռեկտորի նախագահությամբ: Մասնագիտական շեմային քննությունների անցկացման համար ռեկտորի հրամանով, ըստ շնորհվող որակավորումների, ձևավորվում են քննական հանձնաժողովներ՝ համապատասխան որակավորման մագիստրոսական ծրագրեր իրականացնող ամբիոնների վարիչների անդամակցությամբ:

4. Օտարերկրյա բուհերի շրջանավարտների ընդունելությունը կատարվում է մասնագիտական քննական հանձնաժողովի անցկացրած հարցազրույցի



արդյունքների, ուսումնական և արտաքին կապերի բաժինների կարծիքի հիման վրա՝ ընդունող հանձնաժողովի որոշմամբ:

5. Առկա մագիստրատուրայի ընդունելությունը կատարվում է երկու փուլով.

5.1. Առաջին փուլում պետության կողմից ուսման վարձի լրիվ փոխհատուցմամբ (անվճար) ընդունելության մրցույթին մասնակցելու համար կարող են դիմել միայն համալսարանի առկա բակալավրիատի 2017-2018 ուսումնական տարվա համապատասխան որակավորում<sup>1</sup> ունեցող այն շրջանավարտները, որոնց դիպլոմի հավելվածում գրանցված ուսումնառության բոլոր կիսամյակների արդյունքում կուտակված միջին որակական գնահատականը (ՄՈԳ) կազմում է առնվազն 86: Թափուր տեղերի առկայության դեպքում մրցույթին կարող են մասնակցել նաև **տվյալ մասնագիտությամբ** այլ բուհեր ավարտած դիմորդները:

Ընդունելությունը կատարվում է մրցութային հիմունքներով՝ ըստ դիմորդների ՄՈԳ-երի (հարյուրերորդականի ճշտությամբ):

Դիմորդների հավասար ՄՈԳ-ի պարագայում առաջնահերթության կարգով հաշվի են առնվում հետևյալ լրացուցիչ չափանիշները՝

- գերազանցության դիպլոմի առկայությունը,
- ավարտական աշխատանքի պաշտպանությունից ստացած միավորը,
- մասնագիտական առարկաներից ստացած միավորների գումարը:

Բանակից զորացրված դիմորդների համար նախատեսված տեղերի շրջանակներում տվյալ կրթական ծրագրով առկա անվճար ուսուցման մագիստրատուրայի ընդունելության մրցույթին մասնակցելու համար կարող են դիմել ՀՊՏՀ բակալավրի համապատասխան որակավորում ունեցող, պարտադիր ժամկետային զինվորական ծառայություն անցած և վերջին երեք տարվա ընթացքում զորացրված դիմորդները: Ընդունելությունը կատարվում է առանց շեմային քննության, մրցութային կարգով՝ նախորդ ուսումնառության դիպլոմի հավելվածում գրանցված ՄՈԳ-ի հիման վրա: Ընդունելության վերաբերյալ որոշումը կայացնում է ընդունող հանձնաժողովը:

---

<sup>1</sup> Համալսարանում իրականացվող կրթական ծրագրերով տրվում է երեք որակավորում՝ տնտեսագիտության բակալավր/մագիստրոս, կառավարման բակալավր/մագիստրոս և վիճակագրության բակալավր/մագիստրոս: Մագիստրատուրայի ընդունելության ժամանակ **տնտեսագիտության որակավորմամբ** իրականացվող կրթական ծրագրերը բաժանվում են **երկու խմբի**: Առաջին խմբի մեջ մտնում են «Տեսական տնտեսագիտություն», «Մակրոտնտեսական քաղաքականություն և կանխատեսում», «Միջազգային տնտեսական հարաբերություններ», «Բնօգտագործման տնտեսագիտություն», «Աշխատանքի տնտեսագիտություն», «Ձեռնարկությունների տնտեսագիտություն և կառավարում» և «Մաթեմատիկական մեթոդներ և մոդելները տնտեսագիտության մեջ» բակալավրական կրթական ծրագրերը, իսկ երկրորդ խմբի մեջ՝ «Հաշվապահական հաշվառում (ըստ ճյուղերի)» և «Ֆինանսներ» բակալավրական կրթական ծրագրերը: **Կառավարման որակավորմամբ** իրականացվող կրթական ծրագրերն են՝ «Կառավարում», «Պետական և մունիցիպալ կառավարում», «Հակաճգնաժամային կառավարում», «Ձբոսաշրջության կառավարում», «Կառավարման տեղեկատվական համակարգեր» «Մարքեթինգ (շուկայագիտություն)», «Կոմերցիա», «Բիզնեսի կազմակերպում», «Ապրանքագիտություն և ապրանքի որակի փորձաքննություն» կրթական ծրագրերը: **Վիճակագրության որակավորմամբ** իրականացվող բակալավրական կրթական ծրագիրն է «Վիճակագրություն»-ը:



5.2. Երկրորդ փուլում առկա մագիստրատուրայի վճարովի համակարգ կարող են դիմել ՀՊՏՀ (նաև 5.1. ենթակետի պահանջները չբավարարելու դեպքում) և այլ պետական ու ըստ մասնագիտությունների հավատարմագրված ոչ պետական բուհերի առկա և հեռակա ուսուցման ընթացիկ և նախորդ տարիների բակալավրի, դիպլոմավորված մասնագետի կամ մագիստրոսի որակավորում ունեցող շրջանավարտները:

Սահմանված տեղերի շրջանակներում, առանց մասնագիտական շեմային քննության, ընդունելության մրցույթին մասնակցում են համապատասխան որակավորման ՀՊՏՀ շրջանավարտները: Ընդունելության վերաբերյալ որոշումը կայացնում է ընդունող հանձնաժողովը:

Անվճար ուսուցման համակարգի մրցույթից դուրս մնացած պարտադիր ժամկետային զինվորական ծառայություն անցած և վերջին երեք տարվա ընթացքում զորացրված դիմորդները կարող են մասնակցել վճարովի համակարգի ընդունելությանը՝ մրցութային կարգով: Պարտադիր ժամկետային զինվորական ծառայություն անցած և ավելի քան երեք տարի առաջ զորացրված դիմորդների ընդունելությունը կատարվում է միայն վճարովի համակարգում՝ մրցութային կարգով: Ընդունելության վերաբերյալ որոշումը կայացնում է ընդունող հանձնաժողովը:

6. Ըստ կրթական ծրագրերի ընդունելության շեմային քննությանը դիմորդը մասնակցում է, եթե ՀՊՏՀ համապատասխան որակավորման կամ այլ բուհի նույն մասնագիտության բակալավրիատի շրջանավարտ չէ: Դիմորդն իր հայտագրած կրթական ծրագրի (ծրագրերի) համար շեմային քննություն է հանձնում հետևյալ առարկաներից.

- 1) «Գործարար վարչարարություն (կառավարում)», «Պետական և մունիցիպալ կառավարում», «Նախագծերի կառավարում», «Սոցիալական կառավարում», «Հանրային կառավարում» մասնագիտացումների համար՝ «Մենեջմենթ».
- 2) «Աշխատանքի տնտեսագիտություն», «Աշխատանքի և աշխատավարձի կազմակերպումը ծառայությունների ոլորտում» մասնագիտացումների համար՝ «Աշխատանքի տնտեսագիտություն».
- 3) «Ձեռնարկությունների տնտեսագիտություն», «Միկրոտնտեսագիտական վերլուծություն», «Ձեռնարկատիրական գործունեություն» մասնագիտացումների համար՝ «Ձեռնարկությունների տնտեսագիտություն և կառավարում».
- 4) «Արտաքին առևտրային քաղաքականություն», «Միջազգային արժույթաֆինանսական հարաբերություններ» մասնագիտացումների համար՝ «Միջազգային տնտեսական հարաբերություններ».
- 5) «Հողագույքային հարաբերություններ» մասնագիտացման համար՝ «Հողագույքային հարաբերություններ».



- 6) «Պետական գույքի կառավարում» մասնագիտացման համար՝ «Պետական գույքի կառավարում».
- 7) «Մակրոտնտեսական վերլուծություն», «Տնտեսության պետական կարգավորում» մասնագիտացումների համար՝ «Մակրոտնտեսական կարգավորում».
- 8) «Մարքեթինգային հետազոտություններ», «Մարքեթինգային հաղորդակցություններ» մասնագիտացումների համար՝ «Մարքեթինգ».
- 9) «Հանրային ֆինանսներ», «Կորպորատիվ ֆինանսներ», «Հարկային վարչարարություն», «Պետական եկամուտների վերլուծություն և կանխատեսում» մասնագիտացումների համար՝ «Ֆինանսներ».
- 10) «Հաշվապահական հաշվառում» մասնագիտության համար՝ «Հաշվապահական հաշվառում».
- 11) «Աուդիտ» մասնագիտացման համար՝ «Աուդիտ».
- 12) «Վիճակագրություն», «Տնտեսության վիճակագրական վերլուծություն և կանխատեսում», «Կիրառական վիճակագրություն և մտավոր վերլուծություն» մասնագիտացումների համար՝ «Վիճակագրություն».
- 13) «Կառավարման տեղեկատվական համակարգեր», «Էլետրոնային բիզնես» մասնագիտացումների համար՝ «Կառավարման տեղեկատվական համակարգեր».
- 14) «Տնտեսագիտության տեսություն» մասնագիտացման համար՝ «Տնտեսագիտության տեսություն».
- 15) «Բնօգտագործման տնտեսագիտություն» մասնագիտացման համար՝ «Բնօգտագործման տնտեսագիտություն».
- 16) «Մաթեմատիկական մեթոդներ և մոդելները տնտեսագիտության մեջ» մասնագիտացման համար՝ «Տնտեսական գործընթացների մոդելավորում».
- 17) «Ապահովագրական գործ» մասնագիտացման համար՝ «Ապահովագրական գործ».
- 18) «Արժեթղթերի շուկայի վերլուծություն և կառավարում», «Կոլեկտիվ ներդրումային համակարգերի կառավարում» մասնագիտացումների համար՝ «Արժեթղթերի շուկայի վերլուծություն և կառավարում».
- 19) «Բանկային գործունեության կազմակերպում» մասնագիտացման համար՝ «Բանկային գործ».
- 20) «Մաքսային վարչարարություն» մասնագիտացման համար՝ «Մաքսային գործ».
- 21) «Հակաճգնաժամային կառավարում» մասնագիտացման համար՝ «Հակաճգնաժամային կառավարում».
- 22) «Զբոսաշրջության կառավարում» մասնագիտացման համար՝ «Զբոսաշրջության մենեջմենթ».



23) «Ապրանքագիտություն և ապրանքի որակի փորձաքննություն» մասնագիտացման համար՝ «Ապրանքագիտություն և ապրանքի որակի փորձաքննություն».

24) «Կոմերցիա» մասնագիտացման համար՝ «Կոմերցիա».

25) «Բիզնեսի կազմակերպում» մասնագիտացման համար՝ «Բիզնեսի տնտեսագիտություն և պլանավորում»:

7. Դիմում-հայտում դիմորդը կարող է հայտագրել 2 (երկու) մագիստրոսական կրթական ծրագիր՝ ըստ նախապատվության: Հայտում նշված առաջին ծրագրի չբացվելու կամ մրցույթից դուրս մնալու դեպքում դիմորդը մասնակցում է երկրորդ ծրագրի մրցույթին: Ծրագիրը չի բացվում, եթե ուսանողների թիվը չի համապատասխանում ՀՊՏՀ գիտական խորհրդի 2016 թվականի հունիսի 22-ի N 9 նիստով սահմանված պահանջին: Եթե դիմորդը չի ընդունվում իր հայտագրած կրթական ծրագրերից որևէ մեկում կամ հայտագրած ծրագիրը չի բացվում, ապա ընդունող հանձնաժողովը կարող է նրան առաջարկել որևէ այլ կրթական ծրագիր, որտեղ առկա են թափուր տեղեր՝ տվյալ կրթական ծրագրի մուտքային պահանջները բավարարելու կամ շեմային քննությունը հանձնելու պայմանով:

8. Դիմորդները ներկայացնում են հետևյալ փաստաթղթերը՝

1) մագիստրատուրայի ընդունելության դիմում-հայտ (լրացվում է տեղում).

2) բարձրագույն կրթության դիպլոմի և դրա հավելվածի բնագրերն ու պատճենները.

3) անձնագրի բնօրինակը և պատճենը.

4) 2 լուսանկար (3 x 4 չափսի).

5) զինվորական գրքույկի (առկայության դեպքում) բնօրինակը և պատճենը:

9. Դիմորդների փաստաթղթերն ընդունվում են՝ 1-ին փուլով՝ հունիսի 5-ից մինչև հունիսի 12-ը ներառյալ, 2-րդ փուլով՝ հունիսի 5-ից մինչև հուլիսի 5-ը ներառյալ՝ ժամը 9:00-17:30: Շեմային քննությունը տեղի կունենա հուլիսի 6-ին, ժամը 10:00-ին: Ընդունելության արդյունքները հրապարակվում են՝ 1-ին փուլով՝ մինչև հունիսի 15-ը, 2-րդ փուլով՝ մինչև հուլիսի 13-ը:

10. Վերջին երեք տարիներին ժամկետային պարտադիր զինվորական ծառայությունից զորացրված դիմորդների համար նախատեսված տեղերի շրջանակներում փաստաթղթերն ընդունվում են մինչև տվյալ տարվա օգոստոսի 25-ը ներառյալ:

11. Առկա ուսուցմամբ վճարովի մագիստրատուրա ընդունված դիմորդների վերջնական հրամանագրումը կատարվում է առաջին կիսամյակի ուսման վարձի վճարման թույլտվություն ստանալու պահից հետո մեկ ամսվա ընթացքում առաջին կիսամյակի ուսման վարձը վճարելու և վճարման կտրոնը մինչև օգոստոսի 20-ը ընդունող հանձնաժողով ներկայացնելու դեպքում: